



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

Tir Yimiyim

tiryimiyim@aolima

tir yimiyim

TAPAK 7

Moise tepsetba ken o nung security tekolakba apu

West Bengal CMMamata Banerjee-i PM Modi den ajurutep

VOL. XVIII NO. 284 (ADOK 284) DIMAPUR

RASEMNÜ (WEDNESDAY)

CHITENI (JULY 28, 2021

₹ 5.00

## Mizoram-i CRPF aser Assam sorkar aitsür Assam Police battalion 3 mapa lemküksütsü

**Aizawl/Guwahati, July 27, 2021 (Agencies):** Mizoram-Assam arrtsü anasa mapa lemküka aliba Central Reserve Police Force (CRPF)-i tensa tiptema ayutsü mapa meinyakba atema aitsür.

Mizoram kübok Kolasib district aser Assam kübok Lailapur anasa Hombarnü Mizoram aser Assam police tem tsünga khatpeba sülen CRPF aitsütsü tenzükogo. Iba lendong nung Assam Police pungu tashi taküm sama.

Yaküm August ita arrtsü mangatettep adokba sülen tensa aziüksü atema Centre sorkari arrtsülen central paramilitary forces mapa lemküka liasü.

Mizoram tsütsü CRPF aser Assam tsütsü Sashastra Seema Bal (SSB) sepaitem "neutral forces" ama mapa lemküka lir.

"Yashi Assam nungi police den civilian temi Mizoram lushii aitung central paramilitary forces-i parnok menokdang" ta Mizoram Information & Public Relations minister Lalruatkima-i tanü ashi.

Hombarnü khatpebang prangpong maliba Mizoram police kar CRPF tesep nung jenoktsü atema ao saka CRPF-i parnok kümzüksü asoshi meyaritep, ta Lalruatkima-isa ashi.

"Assam police-i Mizoram lushii telungi aitung CRPF-i parnok noktang asübo lendong matalokla" ta paisa ashi.

CRPF jawan temi Assam armed police personnel aser civilian tem yari ta Serlui constituency nungi MLA Lalrinsanga Ralte-ia tai tongloktsüogo.

Assam police-i prangpong-injang teperi bener arua CRPF tesem atsünga agi aser sülen CRPF tesep anasa aliba Mizoram police indang duty post nungi police 15 shi meindok, ta paisa metetdaksü.

Assam police-i Mizoram lushii nung süki ka yanglutsü merang aser idangji Vairengte nung alirtemi parnok noktangdang raratep, ta Ralte-isa ashi.

Mizoram nungeri paramilitary force dak tamang makar kechiyong parnoki arrtsülen tensa mazüokteter, ta paisa shisem.

"CRPF-i tensa aziüksü atema mapa meinyak. Assam police den civilian temi prangpong abenba den ambulance bener aru. Parnoki CRPF ajanga süi aser tashiyim amshia duty post nungi Mizoram police meindok" ta Vairengte joint

village council chairman R. Lalfamkima-isa ashi.

"Assam police-i Assam nungi civilian tem den raratep aser iba sülen Mizoram police o civilian tsütsü tenük amdaksüba mokozü pokloksü aser injang khaloktsü. Iba mapangji state ana nungi police tem tsünga jembishinü tesüdak liasü" ta Lalfamkima-isa ashi.

Iba mapang CRPF sepaitemi kecha mashi aser Assam tsütsü nungi arurtem menoktang, ta paisa tai tongloktsü.

Assam police aser civilian temi arrtsülen paramilitary forces tesep ana aser state police duty post ka tashiyim agi ajang aser iba ajanga lendong atalok. Mizoram nungeri Assam kübok Lailapur anasa aliba SSB tesep kodang madener, ta Vairengte joint YMA president Zalawta-isa ashi.

Külen, Centre-i Mizoram sorkar dang tang Mizoram police anenzüka aliba tesemi CRPF tesep belentsü tetuyuba agütsüogo.

"Centre-i Mizoram police camp alidaki CRPF tesep belentsü ashiba magizüker kechiyong Vairengte nung alirtemi CRPF jawan tem dak tamang makar" ta Lalfamkima-isa metetdaksü.

Külen, Assam CM Himanta Biswa Sarma-i Mizoram den arrtsü anasa commando battalion 3 tashi mapa lemküksütsü osang metetdaksüogo.

Assam Police indang commando 4000 shi ka Hailakandi, Karimganj aser Silchar nung mapa lemküksütsü, ta Sarma-i Mongulbarnü ashi.

"Mizoram-i minute 30-25 shi ka light machine guns (LMGs) amshia injang khaloktsü aser idangji Assam police 5 khaset. Iba atema sasa bilemer" ta paisa ashi.

Hombarnü Mizoram police den raradang Assam indang ali inch ka dang magütsü, ta Chief Minister Sarma-isa ashi.

"Assam nunger mesüra Mizoram nunger forest land nung melidaksütsü. Mizoram

ktdangsurtemi Cachar district ajanga atsünga agi nung onoki injang mekhadoktsü" ta paisa ashi.

"Ni police dang civilian dak injang khalokjang ta mashitsü. Tanurtem khasetsü akok. Onoki tai maketba nisungtem metepsettsü. Onoki mangyanga mekhateptsü. Onoki ozü ali kümzüka ayutsü saka injang mamshitsü" ta CM Sarma-isa metetdaksü.

## Dimapur nung auto anishirtem dak COVID-19 tendangtsü

**Dimapur, July 28, 2021 (TYO):** July 28, 2021 nü Dimapur nung auto driver tem dak COVID-19 tendangtsü ta Dimapur Deputy Commissioner & District Task Force Chairman, Rajesh

Soundararajan, IAS-i metetdaksüogo.

Bodbarnep 10:00 ako nungi Railway Station Auto Parking nung auto driver ajak tendangtsü ta paisa ashi.

## Assam-Mizoram arrtsü shibanga lir; MHA-i ketdangsürtem jaoker

**New Delhi, July 27, 2021 (Agencies):** Yashi Assam-Mizoram arrtsülen lendong atalokba sülen Union Home Ministry-i Assam aser Mizoram nungi tongti ketdangsürtem jaokogo, aser külen Central Reserve Police Force (CRPF) nübo teimba mapa lemküka anüksü tenzükogo.

Mizoram-i arrtsülen sepa talila mapa lemküka lir aser iba atema Assam chief minister Himanta Biswa Sarma-ia Mizoram den arrtsülen commando 4,000 mapa lemküksütsü ta shiogo.

Mizoram sorkari gari lenmangtem yangluba atema Assam sorkari Supreme Court nung ken o benoktsü, ta Sarma-isa ashi.

Mizoram sorkari 1875 border alignment nung aser külen Assam sorkari 1933 demarcation nung ajemdaker noktaka ajanga state ana tsünga arrtsü mangatettep adoka lir.

Mongulbarnü Lailapur, Assam aser Vairengte, Mizoram tsünga

tensa mejungi akümdak CRPF-i nübo talila lemküka anüker.

"Company pungu tashi mapa lemküksüogo aser ano company ana renema lir" ta CRPF director general Kuldip Singh-i ashi.

"Yashi Mizoram-i inyakba ama onokibo meinyaktsü. Assam-i India senso shinga anema injang mamshitsü. Onoki Mizoram den yimtenren tsütsü mangatettep kecha mali saka atalokba atema kuli lir. Iba atema onoki Mizoram den jembio aser bushisügang shitak asütsü shiogo" ta Assam CM Sarma-i tanü ashi.

Ajüsüaka, Mizoram sorkari iba oji magizüker aser Assam police-i Mizoram telungi ait aser parnoki mezüng injang khaloktsü ta ashir.

"Assam police-i injang khaloktsüba atema ozü police-i meyipar khatpe. Assam police-i Mizoram telungi ait aser ozü nübortem dak teka sangshi. Ozüng alema inyakba atema sasa bilemer aser tasürtem asoshi mang ayimer" ta Mizoram home minister Lalchamlia-isa ashi.

Union home secretary Ajay Bhalla-i Bodbarne Assam aser Mizoram nungi chief secretary aser director general of police tem den ajuruteptsü.

Iba senden nung MHA nung tongti ketdangsürtem den intelligence agencies aser paramilitary forces nungi ketdangsürtem adentsü.

MHA-i state ana dang ozüng alema mapa meinyaki arrtsü ken o angatetteptsü atema tetuyuba agütsüogo.

"State tem tsünga arrtsü tsütsü mangatettep adokdang ministry-i tiyongtsü nung ia yariteper saka bangdak state sorkartem tsünga amalitepa angatetteptsü akok" ta Minister of State for Home Affairs, Nityanand Rai-isa ashi.

"Assam-i tanga state tem den arrtsü mangatettep ken o tenet shi adoka lir. Assam-i Mizoram, Arunachal Pradesh, Nagaland aser Meghalaya den arrtsü dak sendakba ken o tem lir" ta Minister Rai-isa metetdaksü.

## COVID-19 Nagaland: 110 dak putet, 5 asü

**Kohima, July 27, 2021 (TYO):** Mongulbarnü Nagaland nung nisung 110 dak COVID-19 aliba putet aser nisung 5 asü.

"Tanü nisung 110 dak COVID-19 putet. Parnokji Dimapur nung 49, Kohima nung 28, Mokokchung nung 13, Kiphire, Longleng o Mon nung pezüzü (4), Peren, Tuensang o Wokha nung anana (2) aser Phek o Zunheboto nung kaka (1) lir. Parnok züngsema nisung ajak agi 27,472 kümogo" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Tanü COVID-19 puteta alir nisung 42 taneptsü angu. Parnokji Dimapur nung 16, Mokokchung nung 10, Kohima o Peren nung trokrok (6), Zunheboto nung 2

aser Mon o Phek nung kaka (1) lir. Parnok züngsema nisung 24,835 taneptsü nguogo" ta paisa ashi.

Nagaland nung COVID-19 nungi taneptsü angurji 90.40% lir aser tang nisung 1,316 anepaludar, ta Dr Kikon-isa ashi.

Mongulbarnü COVID-19 puteta alir nisung 5 asü. Parnokji Dimapur nung 2 aser Kiphire, Mokokchung o Tuensang nung kaka liasü. Tanü asürtem züngsema nisung 550 süogo saka nisung 14 bo tanga tashidak ajanga asü, ta paisa metetdaksü.

"Tang tashi nung COVID-19 alitsü akok ta temolung melemi bilemba sample 257,573 tendang. RT-PCR ajanga 101,927, TrueNat ajanga 67,123 aser Rapid Antigen Test ajanga

88,523 tendang" ta Dr Kikon-isa ashi.

"Hombar tashi nung Nagaland nung nisung 602,985 nem COVID-19 vaccine indang dose 745,254 agütsüogo" ta State Immunization Officer, Dr Ritu Thurr-isa ashi.

Vaccine agirtemji frontline workers 60,711, healthcare workers 15,957, arishi küm 45 ser temapur 182,325 aser arishi küm 18 nungi 44 tsünga alir 343,992 lir, ta pai ashi.

"Vaccine agirtem rongnungi nisung 142,269-i dose anaprong agiogo. Parnokji frontline workers 38,459, healthcare workers 12,260, arishi küm 45 ser temapur 91,263 aser arishi küm 18 nungi 44 tsünga alir 287 lir" ta Dr Thurr-isa metetdaksü.

## Nagaland indang 'District wise crop calendar' adokogo

**Dimapur, July 27, 2021 (TYO):** July 27, 2021 nü Directorate of Agriculture Kohima nung 'District wise crop calendar' sayaogo.

Agriculture Department Director, M. Ben Yanthan-i iba calendar sayatsü aser pai ashi agi Crop calendar ya len aniba kaket ka ama amshitsü atema adok.

Tsünüsenbongtsü teimba tsünütetsü asoshi department-i district shia nung

tsünüsenbongbaren indang calendar adoktsü telemetba agi ta paisa ashi.

"Iba 'crop calendar' ya tang mezüng adoker aser tarutsü nung ano Nagaland kübok district ajak densema tasen adokshitsü. Iba mapa inyakba nung IPR Department-ia osangtsüsang agütsüba asoshi pelar" ta Yanthan-isa ashi.

Iba sentong nung districts, subdivisions, institutes,

Laboratories aser Farms ajak nem Crop Calendar agütsü.

Agriculture Department-isa DAOs aser SDAOs ajak den senden ka amen aser idangji tsünüsenbongtsü nung tashidak atuba aser tzünglu marui timtemba onüktem lemsatepa liasü.

Sentong nung mendenji Joint Director Dr. I Amenla liasü aser Dy. Director Medoville Ladu-i anküp tepela o jembi.

## Covid putetaka meshirangertem pei kidang takdang balaka nung mongdaksür, idangji -

Pei alidak aser ayipdak mopong aitsüsa kichiba (window & ventilation) lapoka yuang. Akok tashi süngjanglijang aser süngolemba agi tua chiyongtsü tajung chiang aser tzü aser juice jemang. Pei meyong mobile phone, kumesü aser toothbrush nunger ama melentepa tamshi. Mozü achitsü agüja lira, aji shitak chiang. Tango junga mesashiteta, teku ashiba, aketba aser temang metaba timtem lira yakta doctor bushiang.



Tir Yimiyim

## Mokokchung nung COVID-19 mozü indang tali jangjashiba sentong agi



Mokokchung DC, Limawapang Jamir-i COVID-19 mozü indang tali jangjashiba sentong o jembiba noksa nung angur.

**Dimapur, Chiteni/July 27 (TYO):** Mokokchung nung sorkar mapa inyaker COVID-19 mozü magi alirtem nem iba mozü agitsü kota tongtipang ta tali angatetjemdaktsüsü asoshi sentong ka July 27, 2021 nü Town Hall, Mokokchung nung ayongzüka agia liasü.

Sentong nung jembiba mapang Deputy Commissioner, Mokokchung, Limawapang Jamir-i ashiba agi, tashiyim agi COVID-19 mozü agidaktsüsü nükjiding nung iba sentong ya

ayongzüka masü saka sensaksem kaa iba mozü indang tali rajemtsü aser nüburttem mozü agidaktsüsü asoshi ayongzüka lir.

Iba sentong nung shisalen sayur, Dr. Yanger-i mozü agiba tajangzüik indang rateta ashi.

COVID-19 tashidak wara wave tasembuba arutsü ta jembiba ya koktetsü atema lenmang ajak agi temsüa alirtem mozü agitsüba ya dang lir, ta pai ashi.

Mozü ya agiba ajanga

COVID-19 tashidak agi menepaka mozüki nung anepalutsüsa tashi agi meshiranger aser asüba nungi kumzüker, aser district nung COVID-19 agi asür ya timba mozü magi alirtem lir, ta ashi.

Iba sentong ya tembangba sülen DIO Mokokchung, Dr. Ayangla Saku aser Dr. Yanger na tawabangba kübok nisung 26 mozü agia liasü. Iba sentong nung SDO (C) Mokokchung, Sentilong Ozukum menden liasü.

## Tuensang DPDB senden nung ICDS project tem lemsatsü jembi

**Dimapur, Chiteni/July 27 (TYO):** Tuensang District Planning and Development Board (DPDB) pur ita shia amenba senden July 27, 2021 nü Deputy Commissioner aser Vice-chairman, DPDB, Tuensang, Kumar Ramnikant IAS lenisüba kübok DC indang Conference Hall nung mena liasü.

Iba senden nung 51A/C Noksen, 52 A/C Longkhim Chare, 53 A/C Tuensang Sadar 1, 54 A/C Tuensang Sadar - 11 aser 58 A/C Shamator -

Chessore kübok 2020-2021 atema LADP agizüksü asoshi onük benoka jembia liasü.

Tuensang kübok MLA shiai COVID Schemes atema sen lakh ter tenlaba atema senden nung mendenpubai pelaba lematep.

Board ajangasa ICDS Sangsangnyu project ya ana kuma lemsatsü jembia liasü, koba CKS tir Nungasang Lemba Chang-i table süa liasü.

Pai ashiba agi, Sangsangnyu ICDS ya project tulutiba liasü, koba agi Assembly

Constituency asem (51, 53 aser 54) nung aliba yimtsüngtem nung angangwadi center 92 tashi awajemer.

Senden nungsa DPDB Tuensang nung Confederation of Chang Students' Union, Tuensang nungi teti atema züngsem ka anioksü lemteta liasü.

Iba senden nung züngsem tasen, BDO Sangsangnyu, Y. Hongtan Chinkhong aser DFO Tuensang Samom Khelen Singh (IFS) nungertem pelashishia agizüka liasü.

## Noklak nung District Fishery Office lapokogo



Advisor, Fisheries & Aquatic Resources, Evaluation, Economic & Statistics, L. Khumo Khamniungan-i July 27, 2021 nü Noklak nung District Fishery Office lapoktsüba noksa nung angur.

**Dimapur, Chiteni/July 27 (TYO):** Advisor, Fisheries & Aquatic Resources, Evaluation, Economic & Statistics, L. Khumo Khamniungan ajanga July 27, 2021 nü Noklak nung District Fishery Office lapokja liasü.

Iba sentong nung Khumo Khamniungan-i jembiba mapang, nüburttem yaritsü asoshi state sorkari lenla ajak nung asameyanga inyaker, ta ashi.

Noklak nung District Fishery Office amenoktsüba atema pai Director, Fisheries & Aquatic Resources, department ketdangsürtem aser sendaktepa

alir ajunga den pelaba lemsatepa liasü.

Pai nüburttem dang department den teka amteper maparen balala tangatetep nung inyaktsü ayongzüka liasü.

Terenlok ajak nung ali nüngdaker, anungji nüburttemi district nung terenlok maparen atema sorkar den amalitepsüla, ta Khamniungan-i ashi.

Paisa aluyimer ajungshiba mapang, ango metsütsü atema department nung mongintem dang nungi shisa agia yimyatem angazüksü ashi.

Iba sentong nung Superintendent of Police, Noklak, Dr. Pritpal Kaur, IPS;

Khamniungan Tribal President, M. Thangou aser Extra Assistant Commissioner, Noklak, P.Pukha Lam nungeria o tatsütsü jembia liasü.

Sentong nung Director, Fisheries & Aquatic Resources, Kevisa Kense, IAS ajanga tongti o jembi aser Pastor, Longdon Baptist Church, Noklak, A. Penglang ajanga iba office meshiteta sarasademtsü.

Iba sentong nung Additional Director, Fisheries and Aquatic Resources, Rongsennungba menden liasü aser District Fishery Officer, Noklak, Dr. Rongsenkumzuk ajanga tepela ankep o jembi.

## Ita trok atema NISHTHA training August ita tenzüksü

**Dimapur, Chiteni/July 27 (TYO):** School Education jenjang tajungba kumdaktsüsü mechi Ministry of Education, Government of India-i National Initiative for School Heads' and Teachers' Holistic Advancement (NISHTHA) ajanga Capacity Building Programme ka tenzükogo.

NISHTHA ya Samagra Shiksha kübok sendaktepa aliba sentong ka lir, koba Ministry of Education, Government of India indang tongtipang sentong ka lir.

NISHTHA kübok modules yangluba ya NEP 2020 den lirumedema 'learning outcome' aser 'learner-centred pedagogy' nung rangloker yangji aser mapang lateter tesayur aser school nung tekolakpur rangben renloktsü nükjiding nung tenzük.

Taküm iba sentong kübok online yimya nung Secondary aser Higher Secondary tesayurtem training agitsü aser Samagra Shiksha, Nagaland ajanga ka kuma lungjemdaktsüsü.

Iba training ya ita trok

atema lir, koba 2021 August ita nungi tenzükaga 2022 January ita tashi alitsü, kong Generic Courses ter-ser ana (12) den Subject Specific Pedagogy ka awajemtsü.

Department of School Education, Government of Nagaland ajanga NBSE kübok tenüng züluoka aliba Private School tema iba training sentong nung shilem agitsü totuyuba agütsü.

Anungji Continuous Professional Development nüngdakba peritsü atema Nagaland Board of School Education ajanga NBSE nung register süa aliba Private School tem ajunga dang (Heads of Institutions aser Secondary aser Higher Secondary tesayurtem) iba training atema July 31, 2021 tashinung tenüng züluoktsü totuyuba agütsü.

Iba training courses dak sendakba osangtem aser guidelines tem ya registration agiba mapang metetdaktsüsü.

Online registration atema yimya balala indang digital clips ya Board indang portal nbsenl.edu.in nung angütsü.



North Eastern Development Finance Corporation puri Mission Oxygen ajanga July 27, 2021 nü Chief Minister's Relief Fund nem sen lakh 15 tenla agüja liasü.

## NBSE ajanga NSEE atema metetdaktsür

**Dimapur, Chiteni/July 27 (TYO):** Nagaland Board of School Education ajanga sangdong ka nung Para Medical/Agri aser Allied degree courses tem atema Nagaland State Entrance Examination (NSEE) 2021 ya August 4, 2021 nü tsünglanglen agüja aliba centre tem nung agitsü, ta metetdaktsüogo.

Candidate temi iba tatidang atema pei Roll nos., ozüng

atema July 29, 2021 nü nungi tenzükaga www.nbsenl.edu.in semdangtsüla.

Tatidang agütsütsüपुरi examination fee sen 600 agütsütsü atema pei Roll no. aser date of birth amshia portal nung login asütsü aser email id aser contact number agütsütsüla aser sen takok ngua agütsüba sülen admit card download asütsüla, ta sangdong ajanga ashi.

### KOHIMA

Sl. No.	Centre	Roll nos.
1	Rüzhükhrrie Govt. Hr. Sec. School, Kohima	210001-210130
2	Baptist High, Kohima	210131-210290
3	Mezhür Higher Secondary School, Kohima	210291-210450
4	Ministers' Hill Baptist Hr. Sec. School, Kohima	210451-210610
5	Bethel Hr. Sec. School, Kohima	210611-210750
6	Grace Hr. Sec. School, Kohima	210751-210862

### DIMAPUR

Sl. No.	Centre	Roll nos.
1	Govt. Hr. Sec. School, Dimapur	210863-210982
2	Greenwood School, Dimapur	210983-211132
3	Christian Hr. Sec. School, Dimapur	211133-211292
4	Don Bosco Hr. Sec. School, Dimapur	211293-211452
5	Little Star Hr. Sec. School, Dimapur	211453-211592

Meghalaya BJP MLA Shullai-i cabinet minister inyaktsü tezüngzüktep agiogo



Meghalaya BJP MLA Shullai-i cabinet minister inyaktsü tezüngzüktep agiba noksa nung angur.

Shillong, July 27, 2021 (Agencies): South Shillong constituency nungi BJP MLA Sanbor Shullai-i Mongulbarnü State cabinet minister inyaktsü tezüngzüktep agiogo.

Raj Bhawan, Shillong nung Meghalaya Governor Satya Pal Palik-i pa nem tezüngzüktep agidaktsü.

Shullai-i BJP MLA AL Hek indang mapa Health Minister melenzüksü akok.

Külen, AL Hek-i Earnest

Mawri melenzüka Meghalaya BJP president inyaktsü akok.

Meghalaya Cabinet nungi Hek agenba ajanga nisung aika aoksadaktsüogo saka osang angazükba agi Meghalaya BJP president Ernest Mawrie-i CM Sangma dangi shidi ka züluba ajanga iba ya inyak.

2018 küm state sorkar akümbe sülen Shullai aser Hek indang mapa Health Minister melenzüksü akok. Health minister inyaktsü tenangzüktep agia liasü ta Ernest

Mawrie-i ashi. Tawa Union Home Minister Amit Shah-i Meghalaya semdangba sülen iba telemetba ya agiogo.

Iba mapang Amit Shah-i Meghalaya BJP teshimtet telok ka den ajuruteper aser 2023 nung Meghalaya Assembly elections matongdang party tashi aittsü indang onük lemsatepa liasü.

BJP high command-i Hek nem state party president inyakdaksünür saka party-i 'one man one post' tangatetba nung inyaka onür. Iba jagi Hek-i minister aser state BJP president mapa anaprong inyaka moutettsü.

Tanü Meghalaya chief minister Conrad Sangma-i Sanbor Shullai cabinet nung pelashishia agizükogo.

"Sanbor Shullai-i tanü cabinet minister inyaktsü tezüngzüktep agiogo. Ni pa pelashishia agizükter aser tarutsü atema moatsür" ta paisa ashi.

Assam CM-i Rs 50 lakh teyari agütsütsü metetdaktsü



Mongulbarnü Assam chief minister Himanta Biswa Sarma-i osangbenertem den jempiba noksa nung angur.

Guwahati, July 27, 2021 (Agencies): Mongulbarnü Assam chief minister Himanta Biswa Sarma-i yashi taküm samaba Assam Police kibongtem nem Rs 50 lakh teyari agütsütsü ta osang metetdaktsüogo.

Mongulbarnü Chief minister Sarma-i Silchar nung Assam Police tem tasü mang nung tetushi agütsü. Paisa Silchar Medical College Hospital (SMCH) iba tatalokba nung yirua alirtem semdang.

Iba lendong nung yirur shia nem Rs 1 lakh agütsütsü, ta Chief minister Sarma-isa ashi.

Mizoram den arrtsü anasa mapa lezmüka aliba Assam talila agütsütsü, ta paisa ashi.

Karimganj, Cachar aser Hailakandi atema Assam sorkari commando battalion 3 lapoktsü aser nisung 3,000 shimoktsü, ta Sarma-isa metetdaktsü.

"Assam indang reserve forest indang ali inch ka danga atsünga magidaktsütsü atema Supreme Court nung ken o ka benoktsü" ta Assam Sarma-isa ashi.

Assam sorkarisa July 27 nungi anogo asemnü police pungu aser civilian ka asüba atema mangyimtsü osang metetdaktsüogo.

Iba mapang linük wako tom nung ayutsü aser lokti sentong kecha malitsü, ta

Joint Secretary, (General Administration Department) sangdong ka nung metetdaktsü.

I-PAC team chioktsü atema Mamata-i nisungtem yok

Guwahati, July 27, 2021 (Agencies): Agartala nung I-PAC telok ka pua aliba chiokdaktsütsü atema West Bengal chief minister Mamata Banerjee-i minister ana- Bratya Basu o Mology Ghatak aser Trinamool Congress (TMC) MP Ritabrata Banerjee nungertem yokogo.

Prashant Kishor'er I-PAC telok ka Tripura police-i Agartala nung aliba hotel ka nung puoka lir. Iba telok nung nisung 22 dena lir.

2023 state assembly elections atema I-PAC telok ya Agartala nung mongzükter TMC atema asadangba maparen inyaker.

Parnok anenzüka aliba hotel nungi kimai meyoker.

"Ozü züngsemtem kuli kecha melii dang house arrest nung lir. Onoki iba atema inyaktepar" ta I-PAC-i Hombarnü metetdaktsü.

Yashi TMC national general secretary Abhishek Banerjee-ia Tripura nung BJP sorkar aitsüogo.

Bengal elections nung Trinamool-i takok anguba atema BJP aoksar aser iba jagi I-PAC telok house arrest nun ayur, ta pai ashi.

"BJP-i tim mesüi ketdangsuba ajanga iba linük nung democracy mali kümogo" ta Abhishek Banerjee-isa metetdaktsü.

GOVERNMENT OF NAGALAND  
DIRECTORATE OF TECHNICAL EDUCATION  
NAGALAND : KOHIMA

Dt. Kohima, the 26th July, 2021.

NOTIFICATION

NO. DTE/ ESTT-2/3/2016-17/ : Prescribed application forms for the Diploma Courses outside the State during 2021-22 session may be collected from the Directorate of Technical Education, Kohima (Below New Secretariat Complex) on payment of Rs. 200/- (Rupees two hundred, only) with effect from 28-07-2021 to 10-08-2021 during all working days. The form may also be downloaded from the website www.dtenagaland.org.in and the fee should be paid while submitting the form printed in white paper (A4 size).

The last date for receiving the complete forms whether by hand or by post is 10stAugust, 2021.

Sl. No.	Name of course	Eligibility
1.	Diploma Pharmacy	10 + 2 Science with Biology
2.	Electronics & Communication	HSLC Passed with 40% in Maths & Science together for ST candidate and 50% for General candidate.
3.	Mining Engineering	
4.	Automobile Engineering	
5.	Electrical & Electronics	
6.	Computer Aided Costume Design & Dress Making (For Girls only)	
7.	Architecture Assistantship (For Girls only)	
8.	Electronics & Telecommunication	
9.	Printing Technology	

Sd/-  
(NUNGSANGMENLA IMCHEN)  
Ex-Officio Director  
Issued by DIPR

WORLD  
HEPATITIS DAY  
28 JULY 2021



Omen : HEPATITIS MATATETER

- Viral hepatitis aliba nisungtemi tendangtsü atema MATATETER.
- Viral hepatitis aliba nisungtemi taküm kümzüksü asoshi anepalutsü MATATETER.
- Mashisa aliba tetsürtemi screening aser temang anepalutsü atema MATATETER.
- Sozükli kinü tanurtemi birth dose vaccination atema MATATETER.
- Hepatitis agi kangshiba nisungtemi senzüka yutsüba aser bendanga amshiba inyakyim agientsü MATATETER.
- Lokti tentettemi tajangzük angutsü atema tuluba inyaktsü MATATETER.

TEKARATIBA NUNG ANEPALUTSÜ LENMANG BUSHIANG  
District hospital ajak nung Hepatitis B & C atema Screening & Treatment ANGATI angutsü  
District hospital ajak nung Sero-Positive, Hepatitis B & C atema Viral Load Testing ANGATI angutsü

TETI ITEM  
TEKÜMDANGTSÜTEM  
BENSHIANG



Mask agiang



Teka Metsükang



Tangar den pila liang



Kidang Mongang

NAGALAND AGAINST COVID-19

Covid-19 aser temang timtem atema tasü dangangtsü lira  
Dial State Helpline No. 1800-345-0019/ National Toll Free- 1075.



Department of Health & Family Welfare  
Government of Nagaland



## TIR YIMYIM YIMOBILEM (EDITORIAL)

DIMAPUR RASEMNÜ, CHITENI (JULY) 28, 2021

### Assam den arürtsü tebilemstü

**A**ssam nung Himanta Biswa Sarma aniba BJP government aruba sülen tebu metsükshir inyaksü apusoba mapatem rongnung kaji, par kidanger Nagaland, Mizoram aser Meghalaya den arürtsü ladangtsü atema apusoba mapa ya ka asütsü. Taoba ita tatabanglen Tzurangkonglen Assam police-tem atua agi Naga nung lu nung parnok tesepe yanglua amenokba sülen ano, Tzurangkonglensa tesem kar nung Assam police-temi Naga nung lu raksatsüba aser sign board akuzüka bener aluba tashi atalokdagi. Ajisüaka, asenok tsütsüba asenoki parnok mapa anema sashia menokdangtetba ajanga lendong timtem mataloker. Ajisüaka, yakanü Assam policetemi Mizoram aser Meghalaya arürtsülen inyakba mapatemji reprangdangra, kasa India telongjem kübok alir state kati inyakbo memesük, tsükchir kin ka arua amaker ama amak tenzükba anguogo. Yakanüji kasa mapang nung Assam sepai telok ka Meghalaya arürtsüleni orr yimtsüng ka nung electric yinzü mesanga aotsü yindong azünga aliba lokdoka endoktsüba ajanga yimtaklirtem den tera agi dang azü tokshia meraratep ser senshi. Ajisüaka, Mizoram nungbo Assam policetemi state ana tsüngda arürtsü nung CRPF sepaitem alidak tesem adena tur Mizo nung police alidak tesem ka atsüngdokba agi, parnok tsüngda lendong tulu adoka Assam police trok tashi kasetba osang angashir. Atangji, Assam den kidanger state-tem arürtsü tebilemstü aliba ya tanü tasen masü, akhidang nungi melatetteti aru. Iba jagi mapang mapang shia Nagaland, Mizoram aser Meghalaya len mangatettep adokpet adoker. Ajisüaka, Assam nung Himanta Biswa Sarma Chief minister aküm metetmeteta, par kidanger den arürtsü mangatettep ken o ya tanüang atalok ama, par sepaitem raratsü oset teperi bener kidanger mitsa dena makdoka apusodaktsüba kechi tashi aser kechi tebilemba nung inyaker ta bilemer. Pa dang nungi tashitemeteta aser Assam kübok liasüba nungi Nagaland, Meghalaya aser Mizoram state küma razüka aoba angur yimsüsürtem aika pa jakdang Assam nung yashi tashi yimsü süogo. Ajisüaka, parnok shingaia pei kidanger state amaksü atema Himantai par sepaitem yokba amato meyok aser merara. Tesümgangtsü kaji, Union Home minister arua Northeast Chief minister-tem den senden akaba sülen anogo ana tsüngda Assam Chief ministeri pei kidanger lushi agiyonga aotsü meranger. Mizoram aser Meghalaya otsüji khen toktsür, Assam nungi razüka Nagaland state akümba ken o nunga Naga nung meyong wazüka aliba arem ajak Nagaland state kübok alitsü ta 16 Point Agreement nung shia lir. Ajisüaka, Nagaland-i item aremtemji magitet odang tokja lir. Himanta Biswa Sarma item otsütemji metet nungbo, pai Nagaland arürtsü alema Naga nung lushi agitsü atema par sepaitem meyoktsü. Tangbo item arürtsü dak sendakba ken o ajak ya center government ket nung lir aser parnok shisa tajung agi latettsütsü imlar. Atangji, linük o linük na tsüngda arürtsü nung mangatettep alibaji Northeast India nung dang masü saka alima ajaklen lir, ajisüaka nisungtem asoshi ali tilaka mechi raratepa alitsü agibo putepa ali tajungba, ibayongji ajaki lenchii arua tangatettep kati maru tashi okadak ken o benoka atar. Ajisüaka, tang Assam chief ministeri metetdaksüba shita süra, pai asüng Assam police 4000 Mizoram amaki yoktsü aser kasaji Meghalaya aser Nagaland-ia yoktsü terenemba alitsü. Alia aser nütsünga Assam-sa tuluba aser teimba aser rongsen nunga Mizo, Khasi, Garo aser Naga nungertemi tokteptsüla masü Assam-sa takarba. Ajisüaka, ali asoshi nütsüng aika asüba agi mesüra rongsen akaba agi akoktsü masü saka Tsüngrem aden nung dang akoktsü. Arürtsü ken o ya yutsür, Himanta Biswa Sarma shisa aka nungbo, akok tashi kidanger Mizo, Khasi, Garo aser Naga nungertem den putepa alitsü merangtsü, kechiyong parnok ajak ya par dokan nung kechisarina nungdak ajak alirtem, customers, lir, parnok malira par dokan shibangtsüba akümstü.

## OLEMSABANG

Tanü putu nung yimsüsürtem ya tsünü-i san küp  
sümer nübürtem madak yimsü asüpa mesüka lir

~ R. Imkong Lkr, Dimapur.

(Yashi adok nungi...)

Yangi asenoki angatettsüba olen kaji pei atenba Arogo ka nungji, Arogoi tenüng teta shimteta yutsüba choirtem dak alaka ano tangar kar kententsü nung sempet tajung keta alirtem, aser Tsüngrem o jembitsü nung sempet tajung keta alirtem Arogopurtemi pei yimtsüng aser pei town balala nung alirtem shimteta mapang apir shilem agidaktsütsüla, yamaji asü nung tang tarutsü mapangtem nung parnok jagi pei Arogo nungji temulung agüja arua shilem tajung agitettsü lemagji lir ta metettsüla. Tetezü tamangba yimyatemji tali ulushitsüla. Iba dakji alaka tanü Arogo ka nung Aiertem aser Asangurtem aser tain tashikartem aika ali nungji parnok len annitsü atema Arogoi Advisor, Director, President, Secretary tem shimteta yuja lir. Anungji Arogopurtemi tensa mapang apir, asadanger kelen parnok lenirtem nemji lanurtem asoshiji sen-o-tsü lemzüksütsüla, kodang parnok ket nugn sen-o-tsü lidir parnok maparen tapu aika inyaka otettsü lemagtem lir. Tanü lanurtemi jangraba mapatemji ken tentsü aser drama aitsü amala nung temulung kanga agütsür, saka yangji instrument kar tanga melira parnok yimlabatem tu matalokteti akümer, idangjibo parnok tanishirtemi sentong yanglubatem tu tamakok alutsüba akümer. Saka Arogopurtemi tanü lanurtem taginüba aser teyongyabatemji tilaka tanga ataloktsüdir, parnok maparen tapu aika nung temulung agüja inyakettsüba lemagji lir ta metettsüla. Tanü Arogopurtemi lanurtem ya tera züpazülema doktsüra parnok tanishirtem kisüngibo tzütang tenzüksü, aser oda odabo parnok tanishirtem dena mashi lemagi aotsübaji menua mali. Idangjibo Arogo kaji tebilemstü tulu akümstü, anungji asen tetsü aser tebotem shin o nung ashi ama tsünglu marudang sütsü (anishi) lepa atatsübaji kangasa tongtibang ta shitsür. Yangi ano tsürabourtemi angatettsüba olen kaji, tanü lanurtem rongnung tsürabourtemi ashi angaba tanurtemji noklang nung ter tang alitsü südi, saka tanüngba noklang shilem nung tukurjibo pei mulungba nung tang senzüteper, anungji parnok azüoktsü tesem tajungtibaji C.Y.E telongjem ya tang lir. Anungji Arogopurtemi C.Y.E telongjem ya khen temulung agütsütsüla ta nibo bilemer. Tanü lanurtem ya tim lemag nung anitetra Missionary mapa rongnung tulutibaji ibaji asütsü ta kü tangatetba ka lemsateper.

Tatamsa Arogo ka nung pastor aser pastorni kati annir tenzükertem ajaki kati ka süngpu aputepa, akhümstübutepa, temeimtep nung liyonga otetra kechisarena takoktsü lemagji yangji lir ta metetdi. Aser ano yangi kanga tang mechimenu onük ka amai süka, iba yangi tang Arogo ka nung takok ngua aotsü lemagji lir ta reprangteter. Arogopur rongnung "tsüta menütepba" ya kanga tongtibang ta agnatettsüla, asenoki ibala ya pei-i akokba agi yaritepa ki semteptsüla, iba jagi tang tesentaktep nung tali tashi aittsü ta amanger. Saka karibo ki semtepba ya mashileni angatettsü akok, aser ashitsü, ni ama tongtibang menden ka nung mena yur koda ser medemer ki semdanga senzütettsü ta bilema lira, iba tangatettbajibo asen sobaliba tsütsülen nungia awashi nung mangrang apongba ta ajatsü akok. Kechiba ta süra khristan tajung kaji kodak matong tashibo iba lima nung tang sobaliba aotsü ta metettsüla. Aser ano yangi mamatoktsüba olen kaji, kari asen tang jungra, mesüra langka temeim sayura, ibaji pei dak alangba agi mesüra temsüa aliba agi ajunger ta mebilemi, khen mapang kabo asenia bilemetettsüla, iba dangji tsüta menütep yimya awashi ta ajar.

Tanü tensa mapang nung karibo pei-i azüngba degree yari tenla kidang süale mesüra lokdiliba senden kar nung süale Tsüngrem o nung raa jembiba kisüng jagi teperi ta bilema lira, iba tangatetba kisüng jagibo liyonga aotsübaji meperitsü ta angatettsüla, kechiba ta süra iba lima nung ali tashibo asen sobaliba tajung tu tezülen merepdoka doktsürbo liyonga motettsü, kechiyong asen taküm ya ali tashibo pei kiyongertem den jungtepshitep yimyatem tu mamatoki liyonga aotsüla ta shisemer, kechiyong asen taküm ya kechi agi tembangtsü arr shingaia meteta maka nungji ajak den jungtepa yaritepa aotsübaji tongtibang ta angatetdi.

Tanapuba nung tanü asen tendak lokdiliba ya tongtibang tapu ana angur, mezüngpubaji alima sobaliba yimden yimli yimsüsüba telok aser tanapubaji tamangba yimsü nung lokdiliba tentet ta angur. Item telok ana ya mezüngyongi lokdi telok ka ka tenteta maka, saka koba telok südir süka item ajakji Ni, Na, Pa ta longjemba agi tang telok kaji tenteta bener aoba angur. Yangji tantsür, tambour, tashikar tain aser lanurtem temeyoktep ajak dena lir. Anungji kati ka mesentoki züngshitepa aoba agi tang lokdi kaji tejakleni bener oteter ta metetdi. Yamaji longjemba nung tang tashi lir ta angatetdi, aji oda tamangba yimsü nunga lokdi kaji longjema ali nung tang takok ngua bener oteter ta asüba olen tatsüka lemsateper.

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**

## Obendangertem kaket nungi Lai tekong zülua aliba atem ka tutet



Beersheba, Israel nung Israel Antiquities Authority (IAA)-i Obendangertem kaket nung aliba Lai o atem nung zülua aliba ka tutetba noksa nung angur.

**July 27, 2021:** Israel nung archaeologist temi Judea tenemtsung nung ali tua bushiba mapang nung küm 3,100 tejaklen Obendangertem mapang nung Lai O zülua aliba atem ka tutet.

1,100 BCE mapang nung amshiba marok ka nung "Jerubbaal" tenung zülua liasü, aser iba ya tang mezüing Obendangertem mapang nung amshiba oset mezüing tutetba asütsüa akok, ta Times of Israel

osang ajanga metetdaksü. "Obendanger Gideon ben Yoash ya Jerubbaal liasü, ajisiüka iba marokji pai amshiba asü masüar mejangja," ta archaeologist temi sangdong ka ajanga metetdaksü.

"Laishiba nung shia aliba agi, Gideon-i sepai 300 shim aser aonung Ma'ayan Harod anasa Midian nung maaka liasü," ta Hebrew University of Jerusalem nung Professors aser archaeologists- Yossef

Garfinkel aser Sa'ar Ganor nati metetdaksü.

Laishiba nung Gideon otsü ya Obendangertem tapu 6, 7 aser 8 tem nung shia lir.

"Shephelah aser Jezreel Valley na tsüingda tetsüingda itta aliba apibo Jerubbaal ji Laishiba nung aliba Gideon asütsüa akok mesüra masütsüa akok, kechiyong Obendangertem mapang nung Jerubbaal ka kanga bulua amshiba tenung ka liasü," ta tenatisa metetdaksü.

## Nigeria nung Khristan school ka nung apuba kaketshir 28 chiokogo

**July 27, 2021:** Tan ita tetenzüklen Nigeria nung Khristan school ka nungi apuba kaketshir 28 chiokogo, ta osang ka ajanga metetdaksü.

Tan ita tetenzüklen Nigeria kübok Damishi nung aliba Bethel Baptist High School nungi kaketshir 120 puer oa liasü aser tamalen kaketshir karbo jener liasü.

Kaketshirtem puer aoba teloki kaketshirtem chioktsü atema Naira sen 500,000 khanga liasü (kaketsir shia sen 1,200).

Baptist Convention Tir, Rev. Israel Akanji-i, Arogoi auertemi meshiba ama sen magütsü, saka kibong karibo sen agütsür asütsüa akok, ta metetdaksü.

Nigeria Police otongdar, Mohammed Jalige-i, security sepaitem aser civilian defense forces-i Tsohon Gaya yim anasa kaketsir asem nemzüa lia angu aser taoba hopta nunga kaketsir ana jenteta liasü, ta metetdaksü.

Tamalen ICC Regional Manager for Africa, Nathan Johnson-i, "Puer oa alirtem

atema sarasademjang. Parnok tekaraba nung pei kidangi meyipa arutsü atema asenoki sarasademtsüdi. Onoki Tir Buhari aser Nigeria sorkar na dang tanurtem chioktsü atema inyadaksüner. Tanur ka danga meyirutsü mesüra masütsü atema sorkari tekaraba nung inyaksüla," ta metetdaksü.

"Tarutsü nungbo item ama tatalokba mataloktsü atema Governor El-Rufai-i nüburtem den longjemer inyaksüla," ta paisa shisem.

## YouVersion Bible App ajanga nisung aikati Laishiba züingtettsü

**July 27, 2021:** Kanga nungtugu YouVersion Bible app-i alizüing tasen ka tongtetogo, kechiyong tangbo iba app nung Tsüingrem O (Laishiba) oshi 1,500 nung züingtettsü.

2008 küm YouVersion app tenzüikba sülen iba app kanga nungtugu kümndar aser tangbo iba App nung oshi aika nung Laishiba züingteteter.

2012 küm YouVersion-i iba app nung oshi 100 nung Laishiba agüja liasü, iba sülen 2014 küm nungbo oshi 500 nung Laishiba agütsü aser 2016 nung oshi 1000 nung Laishiba agüja liasü.

Joko YouVersion Bible app nung Laishiba oshi 1,500 nung agütsüba alizüing tongtetogo. Iba app-isa Laishiba version 2,200 alizüing tongtetogo.

YouVersion-i Wycliff Bible Translators den külemi senteper inyaker aser iba alizüing tongtetba atema parnok dang pelaba lemsatepba den külemi alima nung nisung ajaki Laishiba züingtettsü atema maneni meranga inyaksü ajungshi.

Wycliffe nung Executive Director, James Poole-i, alima nung nisung timtibai Khrista osangtajung züingtettsü atema digital aser online formats nung Tsüingrem O angutsü nungdak, ta ashi.

Paisa, "Online ajanga Laishiba azüingba mesüra pei phone nung pei oshi agi Lai azüingba ajanga nisung aikati Khrista agizükba osang aika angazüker. Iba nükjidong maneni ataloktsü atema onoki

akokba tashi oshi balala nung Laishiba meyipzüker," ta metetdaksü.

YouVersion den külemi digital Bible platforms- Faith Comes by Hearing aser Global Bible ajak senteperbo oshi 1,900 nung Laishiba azüingtsü maongka agütsür.

2007 küm pastor Bobby Gruenewald-i Oklahama nung par Arogo atema Bible website ka ama YouVersion ya tenzüka liasü. Iba sülen küm ka dang lirbo YouVersion ya I-phone app store nung mobile app ka ama tenzüik.

Herald Review osang ajanga ashiba agi, iba app tenzüikba sülen mezüingbuba anogo asem nung iba app ya 80,000 ben download süa install asü.

## ANO GO ABEN TSÜNGREM DEN

### Tsüingremer o nung atentenba

*Saka shiba ajemalu aser tanela teraksa ali aser shibai Kü O nung atentena ali, Pa dang ni reprangtsü. Isaia 66:2.*

Kodang Tsüingremi jembir nai atentener asü? Takoksang Tsüingremi ne jembiba aser ne shi temang kongshiba tatemsa jembibaji kodang liasü? Kodang Tsüingremi Yohan den jembir pa tashi ajak lulaa aküm (J.A. 1:17). Kodang Pauli Damaska among nung Yisu ajuru aser Yisui pa den jembir pa ali nung lao (T.M. 9:4); aser kodang Peteri Yisuji shiba angateta aru pai Yisu tsüingdang apudak aser ashi, "Ni nungi pilaang, kechiaser ni temenen nisung ka lir, O Kibuba!" (Luke 5:8).

Teyanglusangi tanga ne den jembir ta bilema marur asü? Temeshiba yimlaa nai Laishibaji azünger asü, taküm melenshidaksüba O Tsüingremi tanü ne den jembiba angar asü. Laishibai ashir, "Kibuba tsüububaji shisatsü tetenzük lir" (A.Shin 9:10). Idakji nai tetsübu agi angatsüba aser ajak nung Tsüingrem akhüm tsübuttsüba mapatem lir.

Nai Lai azüingdang, nai azüingba tekong kar ajanga Tsüingremi ne den indang indanga jembir ta nai angatetsü. Tsüingrem shibai jembir aser alima ajunga yanglu iba tesüingmangtsü shisadangang, Pai tang ne den jembir ta shisadangang. Yisui jembir aser tasür shia arudaksü, yipru süngjemdaksü, temenen tanelatem aridok aser tashi anebtsü süra Pa nungi aruba O jagi ne taküm nung kechi inyaker? Ne dak ataloktsü takoktsüji atentenba? Tanaben nai Laishiba, temeshiba teyimla nung aji lapoka züingang.

## Temeshi Tanela asü Tanela Temeshi koba shidak ?

Tir Yimyim adok nung asen lenir N.Toshi ajanga iba tasüingdangba yimobilem sabang nung adokba ngua nia kü tebilemba yamai langzür. Asen Aolimai Yisu Khrista osang tajung arur joko sangküm küm 150 abensatsü. Item küm ajak nung asenoki Tanela Temeshi ta jembia arur. Laisahiba nunga Tanela Temeshi ta zülua lir. Iba nung ajemdaker asen Aor Tsüingrem osang tajung bener Naga lima Anüdoklen alirtem dangi tsüingdong oa parnok dang Yisu osang tajung asen oshi nung sayutsüngi. Iba mapang parnokia Tanela Temeshi ain jazüka asentenshi sentong tajung ayimoktsüba ajanga parnoka aika temenen nangzüka temolung meyip. Ibajagi par kin aikati Asen Ao oshi nung Temeshi Lai züingteteter. Ao ken kanga junga tenteter. Item mapang ajak nung parnoki Tanela Temeshi ta sarasadem. English ya oshi ka lir, yamaji asen Ao o yaa oshi ka lir. Anungji aiben English nung aliba amajitang meyipdi asünungbo asen oshi jembishinü den mapet akümer. Tatishitsü agi English nung WHAT IS YOUR NAME ? Iba ya English nung aliba ama meyipdi asünung yamaia meyipsü KECHI NÜ TENÜNG? Saka asen Ao o nung NA TENÜNG SHIBA MESÜRA NÜ TENÜNG KECHI ? Ano English nung WHERE ARE YOU GOING ? Iba ya English nung aliba amaji literally meyipdi asünung KONGI NA AOR ? Saka asenoki yamai tang jembir NA KONGI AOR ?

Ano English nung tenung karbo balaka asen Ao nung meyipa lir. Tatishitsü agi Yisu nütsüing tenung John, iba ya Yohan ta ano JAMES ya Yakob ta meyiba jembibaji asen oshinung tetshitsü aser jembitsü tajungba. Ao ken nunga Tanela Temeshi arung ta tang atener. Rivival mapanga Tanela Temeshi Putu ta tang atener.

English nung kangatang tasak ter nung ka Ezra tapu 4:7 nung yamai zülua lir. ARTAZERKZES tendak ta Ao nung zülua lir. Iba tenüngji English nung Yamai zülua lir ARTAXERXES. Iba ya Ao O nung adoktsü kanga tasak. Kechiyong asen Ao O nung X ji junga madokteteter. Iba jagi X melen Z amshia lir.

Iba amaji asen Ao oshinung jembitsü temela olasü nungi meyipa lir.

Anungji joko Yisu tanaben yakta arutsü ta asenoki jembir. Anungji oda küm baikati Tanela Temeshi ta tang jembir aser sarasadem nunga Tanela Temeshi ta tang amshia arurji asenokbo yamaji tang amshinung ajungtsü ta kü tebilemba iba osang kaketsir ajanga lemsateper.

~ Dr Toshimanen Ozüküm, Kohima.

**OLONG PAITEP # 5888**

	1		2						3
4					5		6		
7									
			8						9
10								11	
							12		
13							14		
15									

<b>TIPLÉN</b>		<b>LANGTSÜNGLEN</b>	
1. Taochi sayuba	- 10	1. Menungra	- 6
4. Temezüng agi kongshi	- 4	2. Mi tsükloker mesepba	- 4
5. Ainer	- 6	3. Süngo o tzü ajemba	- 5
7. Chiyungnü	- 3	5. Temenemsü tajung	- 7
8. Mi nung atsük	- 5	6. Idak	- 4
11. Asen masü	- 3	8. _ _ _ _ ok	- 4
13. Lenmang ajurutepdak	- 6	9. Tebangi apuba kongki tapu ka	- 6
14. Yangi masü	- 4	10. Tashi endokba metet	- 5
15. _ _ _ _ _ jang	- 6	12. Tzü manung senzüba	- 4

**OLONG PAITEP # 5887 TELANGZÜBA**

<b>TIPLÉN :</b>		<b>LANGTSÜNGLEN :</b>	
1. Rebeka, 4. Adam, 6. Yohan,		2. Kan, 3. IM, 5. Anüng, 7. Amsü,	
9. Zü, 12. Sayutsüngir, 15. Ku,		8. Yosep, 10. Sara, 11. Isak, 13. Yakob,	
16. Naman, 17. Abel, 18. Samuel.		14. Nana, 16. Noa, 17. Am.	

**AO PASTOR ALOKBA**

**Sobangsang :** Temba naa asüng kongi aotsü?

**Alokba :** Temba (friend) ni asüng (I tomorrow) sentepi aotsü. (Going to church)

**Sobangsang :** Temba, kechiba oshi ana jembir?

**Alokba :** To show my standard Ohh (kü tazüngba sayur ati)

**Sobangsang :** Pastorbai tenla kidang nisung shingaia kibur ana metenzüktet ta ashiato.

**Alokba :** (all right) aji shitak na?

**Sobangsang :** Onokbo BA, MA azüngdang poetry aser drama nungbo oshi ana temeyoktep ta sayu.

**Alokba :** Onokbo BA, MA mazüng class X passed ser Theology dang azüng adi.

**Sobangsang :** Oh Alokba, AU, AU, AU

Lilir : e-mail

**TANÜBO NAI LANGZÜANG**

Q. Koba yimti nung Dvara E-Dairy Solutions lapoka lir?

A. Chennai    B. Mumbai    C. Bangalore    D. Kolkata

(Taruba adok nung onoki langzüksü)

**YASHI ADOK TELANGZÜBA : NASA**

**AO OSHI ANGAZÜKDAK:**

**TANÜ ANGAZÜKTSÜBA OJANG**



**Kimung**

(n) ki asütsü atema ali onteta ayuba (site for house construction)

\* Arogo nungertemi tenla ki **kimung** atu.

**Kin**

(n) azü agi sosemba nübortem (nation)

\* India ya **kin** aikati meyokteper akümba linük ka lir.

**NAI-A YA METETTER MA?**

**INDIA NUNG 'UNESCO WORLD HERITAGE SITE' TEM:**

(Yashi adok nungi...)

- Fatehpur Sikri, Uttar Pradesh
- Rani Ki Vav, Patan, Gujarat
- Group of Monuments at Pattadakal, Karnataka
- Elephanta Caves, Maharashtra
- Nalanda Mahavihara (Nalanda University), Bihar
- Chhatrapati Shivaji Maharaj Terminus (formerly Victoria Terminus), Maharashtra
- Mountain Railways of India
- Outub Minar and its Monuments, New Delhi
- Champaner-Pavagadh Archaeological Park, Gujarat
- Great Himalayan National Park, Himachal Pradesh
- Hill Forts of Rajasthan
- Churches and Convents of Goa
- Rock Shelters of Bhimbetka, Madhya Pradesh
- Manas Wild Life Sanctuary, Assam
- Keoladeo National Park, Bharatpur, Rajasthan
- Nanda Devi and Valley of Flowers National Parks, Uttarakhand
- Western Ghats
- Kanchenjunga National Park, Sikkim
- Capitol Complex, Chandigarh
- The Historic City of Ahmedabad
- The Victorian and Art Deco Ensemble of Mumbai
- The Pink City - Jaipur

**SUDOKU # 5928**

**TELANGZUBA # 5927**

	7		6	8	2			9	5	3	7	1	6	4	9	8	2	
2			1					8	8	2	6	5	9	3	7	4	1	
5	6			3				2	9	4	1	2	7	8	3	6	5	
	8	7							3	7	5	8	1	9	6	2	4	
4		1		6				7	6	8	2	3	4	7	1	5	9	
6					9	1			4	1	9	6	5	2	8	7	3	
7			4	1				2	6	1	9	4	7	2	6	5	3	8
8	1	6							2	6	8	9	3	5	4	1	7	
9	2				6			5	7	5	3	4	8	1	2	9	6	

**OJANG LUTEP # 5473**

- ÜKASÜM :
- SHTSISAÜ :
- TETMAZÜOK :
- MJAKEINYRTEI :
- RNOPAK :
- ASAS :
- TUTARSÜ :
- NGLENMA :
- SHNGEIBAR :
- ÜTASSÜ :

**OJANG LUTEP TELANGZÜBA # 5472**

**NISUNG KANGA TUSHIA BENSHIRA ASEN  
MADAK TENÜK AMUR YIMSÜ ASÜTSÜ**

**TAN HOPTA ATEMA - KOMA SÜLA ?**

Q. Nagaland nung Covid vaccination ya nisungtem teimba ka dak magii anen nunga koma süla ?

# West Bengal CM Mamata Banerjee-i PM Modi den ajurutep



**New Delhi, Chiteni/July 27 (Agencies):** West Bengal chief minister Mamata Banerjee-i Mongolbarnü Ato Kilonser Narendra Modi den par kidang ajurutepogo.

Senden nung mamata-i Covid-19 ken o benok aser Bengal nung vaccine tali agütsütsü nungdakba lemsatop. "Tanü PM den ajurutepogo. Senden nung Covid ken o aser state nung vaccine aser mozü tali nungdakba lemsatopogo. State tenüng melenba dak sendakba nung ken o bangdaka aliba indanga benokogo," ta Mamata-i ashi.

Laisa, PM den ajurutepba sülen Pegasus ken o Supreme Court-i achaayanga

bushisüngdangtsü khanga liasü. "PM-i Pegasus ken o dak sendakba nung party ajak senden ka ayongtsüla. Iba ken o ya Supreme Court-i a c h a a y a n g a bushisüngdangtsüla," ta lai ashi.

NDA anema opposition tem telongjem indang asüngdangba mapang lai, telongjem ya pasasa adokadoktsü ta ashi.

Mongolbarnüsa Trinamool Congress lenir-i Congress lenir Kamal Nath aser Anand Sharma den ajurutep. Senden tembangba sülen Kamal Nath-i, tena tsüngda sentong balala kecha benoka mejembi aser Bengal elections akokba atema dang la nem tenüngsang agüja liasü, ta ashi.

"Sentong balala dak sendakba nung kecha sensak masem. Iba ken o jibo party lenirtemi jembitsü. Onok tang tensa balala ataloker aliba aser oset nung jenjang ajungketba indang dang sensaksema liasü," ta Nath-i ashi.

Maneni Mamata-i nikonngtsütsü Congress lenir aser Rajya Sabha MP Abhishek Singhvi den ajurutepogo aser Congress interim tir Sonia Gandhi den Bodhbarnü ajuruteptsü sentong yanglua lir.

West Bengal nung election term asembuba atonga akokba sülen TMC leniri tang mezüngbuba Delhi semdang aser 2024 Lok Sabha election nung lai tongtibang shilem agütsü imlar.

# CAA kübok ozüng yanglutsü atema sorkari mapang meshilok

**New Delhi, Chiteni/July 27 (Agencies):** Citizenship Amendment Act (CAA) kübok ozüngtem yanglutsü atema January 9 nü tashi mapang atsülangtsütsü centre sorkari asüngdangogo, ta Minister of State for Home Affairs Nityanand Rai-i Mongolbarnü Lok Sabha nung metetdaksü. CAA ya 2019 küm Parliament nung agizükogo.

Congress MP Gaurav Gogoi-i, sorkari CAA kübok ozüngtem yanglua sangdongtsüba mapang süidaksü asü, ta asüngdangba mapang pai iba telangzüba agütsü.

"Citizenship (Amendment) Act, 2019 (CAA) ya 12.12.2019 nü sangdongogo aser 10.01.2020 nü nungi tenzüka

inyaksangshidar," ta minister-i ashi.

"Lok Sabha aser Rajya Sabha nung Subordinate Legislation, Committees nem Citizenship (Amendment) Act, 2019 kübok ozüng yanglutsü atema 09.01.2022 tashi mapang atsülangtsütsü mepeshia asüngdangogo," ta Rai-i ashi.

CAA ajanga Pakistan, Bangladesh aser Afghanistan nung Muslim nung masürtem shirnok reshikangshia amshir, parnok nem India senso agütsütsü.

Ozüng yanglutsü atema tang agi pongbenbuba sorkari mapang atsülangtsütsü atema mepeshia asüngdangogo.

Parliamentary inyakim kübok legislation ka kübok

ozüngtem tir-i agizükba sülen ita trok tsüngda yanglutsüla mesera mapang atsülangtsütsü atema asüngdangtsüla.

CAA nükjiongji Pakistan, Bangladesh aser Afghanistan nung reshikangshia amshiba Hindu, Sikh, Jain, Buddhist, Parsi aser Christian tem nem India senso agütsütsü asoshi lir.

Item tamangba loktitem nungi shirnok India-i December 31, 2014 masüidang arua lir, parnok ya ozüng alema India-i arua alirtem ama mezüngshitsü saka India senso jenjang agütsütsü.

Parliament nung CAA agizükba sülen linük kübok tesem balala nung longkak ait tenzüker aser mepetmesü balala nung nisung 100 shi süogo.



Uttar Pradesh sorkari Early Childhood Children Education (ECCE) scheme takok ngua benoktettsü atema booklets aser pre-school kits tem teperi toktsür Anganwadi centre 1,70,896 yangludat ta sangdongogo.

# Covid agi asür chirnurtem nem Gujarat sorkari teyari agütsütsü

**New Delhi, Chiteni/July 27 (Agencies):** Gujarat sorkari Mongolbarnü sangdong ka ajanga, coronavirus tashidak (Covid-19) agi tsürapur süadoker aliba chirnurtem nem Mukhya Mantri Bal Seva Yojna scheme kübok ita nung sen 2000 teyari agütsütsü, ta metetdaksüogo.

Social justice & empowerment department additional chief secretary Sunaina Tomar-i, chief minister Vijay Rupani-i iba sentong ya August ananü tenzüksütsü, ta ashi. Tomar-isa, district collector tem dang iba scheme agütsü temsüa aliba tanurtem atema anogo asem tsüngda bank accounts lapoktsütsü tetuyuba agütsütsü.

Tang coronavirus tashidak agi tsürapur anaprongla sür aliba tanurtem, Mukhya Mantri Bal Seva Yojna scheme küboki

aitdakja lir aser parnok arishi küm 21 majung tashi ita shia teyari sen 4,000 agütsütsü. Item tanurtem ya kaket shisatsü bushiloka onera arishi küm 24 majung tashi sorkari ita nung sen 6,000 agütsütsü.

Tsürapur anaprongla süadoker aliba tanur 776 nem July ita tetenzüklen sen 4,000 (nisungshia) agütsütsü.

July 9 nü Rupani-i, Mukhya Mantri Bal Seva Yojna atema küm tatakzük 18 aliba 21 kümtsütsü. Pai, tajangzük agütsütsü atema undergraduate aser postgraduate course asadangtsü ta ashiba den item tanurtem nem scholarships agütsütsü atema tongtibangsa maongka agütsütsü, ta shisem.

Gujarat nung tang tashi nung nisung 825,000 dak Covid tashidak potetogo aser nisung 10,076 asüba den nisung 814,356 anepogo.



US Secretary of state Antony Blinken Mongolbarnü India tonga aruogo. Pa India nung anogo ana mungzüktsü aser Afghanistan ken o densema linük ana tsüngda tesendaktep dak sendakba nung onük balala benoka sensak asemtsü.

# Parliament inyakshishi mesütettsüsa minprongtem temai adokdakjang: PM Modi

**New Delhi, Chiteni/July 27 (Agencies):** Ato Kilonser Narendra Modi-i Mongolbarnü BJP MP tem dang, Pegasus spyware ken o dak sendakba nung Parliament nung House anaprongla inyakshishi mesütettsüsa minprongba opposition party tem temai adodaktsütsü shiogo.

"Sorkari sensaksemtsü mulunga lir saka opposition-i memulunger," ta PM Modi-i ashi.

Taoba hopta monsoon session tenzükerba sülen Lok Sabha aser Rajya Sabha naprongla iba ken o dak sendakba nung tiptema inyakshishi mesüteti arudar. Congress party-i, iba ken o ya Supreme Court-i achaayanga bushitsüngdangtsü khangogo.

Pegasus spyware amshia lenirtem meita atatsü asoshi asadanga aliba list ka temai adokba sülen mepetmesü tenzüker. Iba list nung Rahul Gandhi densema opposition lenirtem, activist tem aser India nung osangbener 40 densema liasü, ta The Wire sangdong ka ajanga metetdaksü.

Kasa mapang nung PM-i BJP MP tem dang linük nüjiso ngur küm 75 ajungba benjung parnok constituency kübok

yimtsüng ajak nung ayongzükba amungtsü tetuyuba agütsütsü, ta minister of state for parliamentary affairs Arjun Ram Meghwal-i ashi.

BJP parliamentary party senden nung jembiba mapang Modi-i, linük nüjiso ngur küm 75 ajungba benjungmung ya srokar sentong ka dang masütsüla saka iba sentong nung nüburtem-i shilem agia nüburtem movement ka asütsüla, ta Meghwal-i osangbenertem dang ashi.

Paisa, BJP PM tem dang assembly segment ajak nung sentong ayongzüktsü aser 2047, nüjiso ngur küm 100 ajungba tashi nung India koda kümer lidaktsüner, iba indang nüburtem nungi parnok tebilemba angadangtsü atema party worker anana shimer yoktsü shiogo

Ato Kilonser-i MP tem dang ashiba agi, BJP worker anana yagi assembly constituency ajak nung yimtsüng 75 semdangtsü aser constituency shia nung ghonda 75 intoktsü, ta Meghwal-i ashi

Nüjiso ngur küm 75 ajungba benjung ya local saisapong sentongtem mesera merekmeju sentong ayongzükba mungtettsü, ta Modi-i ashi.



Germany kübok Leverkusen yimti nung Mongolbarnep chemical plant ka poka nisung ka asü aser pezü samar bushir. Anepdang 9:40 ako (par mapang) meta iba lendong atalokba nung nisung 16 yirua liasü. Iba chemical plant ki poksar mi adokba remseptsü ghonda ishika agia liasü. Tang tashi iba lendong tera memetet aser anasa alir dang kilung nung alitsü shiogo.

## Korea linük ana tsüngda tesendaktep yanglushiogo

**Seoul, Chiteni/July 27**

**(Agencies):** North aser South Korea nati Mongolbarnü cross-border communications tanaben amenokshiba sangdongogo. Küm ka tejakdang linük ana tsüngda tesendaktep kanga mejungi akümba sülen tang lenir ana tsüngda tesendaktep yanglushia shiti zülutep tenzükba metetdaksüogo.

Arrtsü aden activists temi Pyongyang anema leaflets tem yokba sülen North Korea-i taoba küm June ita official military aser political communication links ajak shibanga ayutsü telemteba agia liasü.

2018 küm North lenir Kim Jong Un aser South tir Moon Jae-in na asemben tashi ajuruteba senden menaka Korea linük ana tsüngda tesendaktep mejungi aliba mapang North-i official tesendaktep ajak shibanga ayutsü telemteba agi.

Ajisüaka Mongolbarnü communication lines ajak lapokogo, ta linük anayagi metetdaksü.

"Lenirtem tsüngda mulungtepa sülen north aser south-i July 27 nü 10:00 ako nungi tenzükba inter-Korean communication liaison lines ajak lapoktsü atema jenjang agia liasü," ta North Korea indang official KCNA news agency-i metetdaksü.

Linük ana tsüngda tesendaktep tajungba küma aoba mapang ka nung Kim aser Moon na April ita nungi shiti

zülutep tenzükogo, ta South Korea tir office sangdong ka ajanga metetdaksüba den mezüngbuba communication lines ajak lapoktsü atema mulungtepa liasü, ta ashi.

"Lenir anatasa takaratiba nung Korea linük ana tsüngda kati ka dak tamang kateptsü atema inyaksangshitsü aser tesendaktep tajung nung tejakleni aotsü mulungtepa agizükogo," ta kasa sangdong ajanga metetdaksü.

Moon-i achaayanga 2018 küm June ita Singapore nung North Korea aser US tir na mezüngbuba senden ka ayongzükba amen.

Ajisüaka Hanoi nung Kim aser taoba US tir Donald Trump na tsüngda sensaksem tejakleni bener motetba sülen Pyongyang-i Seoul den tesendaktep meyui aküm aser iba ajanga nuclear dak sendakba nung sensaksem bangdaka ayu.

Trump kübok senden asem tashi ayongzükba amenba sülena North indang nuclear arsenal atongsatsü atema tangatettep kati dangi maruteti lir aser tri Joe Biden-i office mapa belenzükba sülen Pyongyang aser Washington napronglai linük ana tsüngda tesendaktep dak sendakba nung jenjang kecha magi atatepdar.

Kim-i June ita, Washington den sensaksem aser telangzükba agütsü atema Pyongyang renema alitsü nungdaker ta shiogo.

North nem nuclear weapon aser missile programme tem

toktsüdaksütsü atema ajungshitsü asoshi tasa asadangshiba mapang White House-i mapa agi inyaka sayua lenmang balaka nungi North den inyakteptsü nangzükogo.

North Korea den sensaksem atema shimba US diplomat Sung Kim-i June ita, Pyongyang den jelia takhangba kecha magütsü mashi mapng aser mashi tesem ka nung ajuruteptsü Washington renema lir, ta ashi.

Ajisüaka Kim Jong Un adianu aser adviser Kim Yo Jong-i iba maongka magizük.

Ken o asadangertemi ashiba agi, Mongolbarnü Korea linük ana tsüngda hotlines tanaben amenokshiba ajanga Washington-i sensaksem atema maongka agütsüba dak sendakba nung Kim-i telangzükba ka agütsüba sayur.

"Korea linük ana tsüngda tesendaktep yanglushiba ajanga North atema domestic aser foreign policies aser politics dak sendakba nung tajangzük asütsü ta pai angatetba ama reprangteter," ta University of North Korean Studies nung professor Yang Moo-jin-i AFP dang ashi.

Sensaksem bangdaker liaka Moon-i Korea linük ana tsüngda tesendaktep yanglushitsü kanga tongtambang ta shia aruogo, ta paisa ashi.

"Iba ya Kim Jong Un-i Seoul aser Washington nem mezüngbuba telangzükba agütsüba ama agütsüba," ta Yang-i ashi.



China nung aliba Zhejiang Province kübok Ningbo tesem nung tzümetsüng agi garitem mubanger aliba noksa ka yangi angur. Typhoon In-Fa ya China anüdoklen Zhejiang Province nung Deobarnü 12:30 ako nung tonga arua liasü.

## Iraq nung US combat mission küm tatemlen anentsü

**Washington, Chiteni/July 27**

**(Agencies):** Iran nung aliba America nunger sepaitemi tsükchir den raraba maparen küm tatem tashinung anentsü saka Iraq sepai nem maneni training agüja yaritsü, ta US Tir Joe Biden-i Hombarnü ashi.

"Iraq nung onoki maneni training agütsütsü, yaritsü aser ISIS (Islamic State) den raraba nung yaritsü, saka küm tatem tashinung raraba anentsü," ta Biden-i Oval Office nung Iraq Ato Kilonser Mustafa al-Kadhimi den senden amendang ashi.

"Mera taseni melenaka kiralongrar anema raraba nung maneni amalitep alitsü," ta pai ashi. Al-Kadhimi-i US semdangtsü lia Iraq nung bendanger sepai ayutsü menüngdak, ta osangbener dang shia liasü.

"Iraq nung aliba US nungertem nungi asen sepai training aser terenlok maparen nung yaridaksüner aser security tsütsü amalitep aginer," ta pai ashi.

Tang Iraq nung US sepai 2,500 shi lir. Hombarnü White House Press Secretary ajanga Iraq nung küm tatami sepai kwi anüngzükba ayutsüar ashitsü memolung.

Iba mera yagi Iraq nung US mitkar aliba balakabo majemtsü, ta US nung osangbener temi ashir, kechiaser yangji tang aliba America nunger sepaitem ya joko Iraq sepai nem training ang agütsür aser shisa agütsür.

April ita linük ana tsüngta US sepaitem indang mission belentsü molungtep, saka idangji

mapang lateta mayu.

Shia teloki Iraq lenirtem dang US sepai ajunga linük yutsür odaktsütsü ajungshir, ta aikati asadangteta lir. US sepaitem ainshiba ajanga October ita parliamentary election agütsü aliba nung al-Kadhimi kanga ajangzüktsü amai angur.

US sepaitem ya Iraq nungi 2011 küm ainshia liasü, koba US-i anir iba linük maker küm ti lir ainshiba alitsü. Iba sülen Islamic State telungpur den raraba nung Iraq sepaitem yaritsü atema US sepaitem ya 2014 küm Iraq-i meyipa shilanga liasü.

2020 küm January ita US-i tayimtsü amshia Baghdad airport amakdang Iran nunger general Qassem Soleimani aser Iraq nunger militia lenir Abu Mahdi al-Muhandis asü, aser iba sülen Iraq nung bendanger sepaitem aliba tatem kati arutsü asoshi Iraq parliament nung pangzüng ka yanglua liasü.

Iba linük tesem balala nung Iraq mitkartem amenoka alidak US sepaitem aliba nung aser central Baghdad kübok Green Zone nung US embassy nung mapang shia Iran-i busemba Shia militia temi rocket aser drone amshia amaker.

Iba mangyang US mitkartemi Syria aser Iraq nung taküm February aser June ita Shia telungpur dak tayimtsü amshia amak, aser yamaji maneni lungtepa maktepa arur.

July ita tetenzüklen Iraq anüolen Anbar province kübok US-i aniba teloktem sepaitem amenoka aliba Al-Assad Air Base nung rocket 14 khalokja liasü.

## Moise tepsetba ken o nung security tekolakba apu

**Port-au-Prince, Chiteni/July**

**27 (Agencies):** Haiti tir Jovenel Moise tepsetba ken o bushisüngdangba maparen nung police temi Moise indang security team nung tekolakba puogo. Moise ya July 7 nü par kidang lia tepseta liasü.

July 7 aonung prangbong bena aliba commando temi injang kata makhadoki tir anüker alema yia Moise tepsetba sentong nung Security chief Jean Laguel Civil shilem lir, ta temolung melemteti lir.

Civil ya linük yimtiba, Port-au-Prince anasa Delmas nung tepuokdak tesem ka nung pa kisüng yua lir.

"Tir Jovenel Moise tepsetba ken o bushisüngdangba nung shilem ka ama police temi Jean Laguel Civil ya Hombarnü apu," ta police odongtar Marie Michelle Verrier-i osangbener dang ashi.

Civil indang okatsür Reynold Georges-ia pa apuba ya The Associated Press news agency dang Hombarnü ashi. Pa apuba ya yimtenren tsütsü nungi ajungmesoba lir, ta

Georges-i ashi.

Ajisüaka Civil anema taittsüba ken o benokba osangbo mali.

Police temi temolung melemteti nisung 12 dak tema apuba nung Civil denogo.

Port-au-Prince commissioner Bed-Ford Claude-i immigration authority dang Moise anütsü nunglokja aliba police tanishir pezü linük alema meyoktsü totuyuba agütsüogo.

Hombarnü police-i Wendelle Coq Thelot aputsü totuyuba agütsü. Thelot ya linük nung tematiba court nung obendanger ka liasü, shiba Moise-i mapa nungi anentsü.

Moise tepsetba indang tejangja ano memetet, saka tasenba Ato Kilonser Ariel Henry-i Moise tepseter nem tapet temerenshi agütsütsü nangzükba lir.

Police temi iba ken o nung Colombia nunger nisung 20 shi pua lir, aser parnok ya Haiti nunger telok kati bendanger den sendakteper tasa yangluba nung shilem ka lir, ta ashir.

## LSHSS nung takok angur kaketshirtem nem tenüngsang agütsü

**Dimapur, Chiteni/July 27, 2021 (TYO):** Hombarnü, Little Star Hr. Sec. School, Dimapur-i, iba School nung State Rank Holder kaketshirtem (HSLC aser HSSLC) den Tesayurtem nem tenüngsang agütsüba sentong ka ayonga agiogo. LSHSS indang School Hall nung SOPs ajak anidaka iba sentong agia liasü, ta sangdong ajanga metetdaksü.

Iba school nungi Class 10 nung Rank Holders 5 aser Class 12 nungi Rank Holders 2 dena lir. Higher Secondary School Leaving Certificate indang Science Stream nung Ohiduz Zaman-i First rank angu. Ano külen, Science Stream nungi State Female Topper aser kasa Stream nung Naga nung rongnung Topper, Pungbale Rangkhau-ia HSSLC tatidang nung First rank angu.

Iba sentong tenzüka, Hr. Secondary Science Stream Supervisor, Miss Ruphes Sakhrie-i sarasadem aser Chairman, Madam Nini Sekhose-i telok pela agizük. Principal, Madam Christina Neikhrinuoi powerpoint presentation ajanga HSLC aser HSSLC Tatidangtem indang result osang metetdaksü.

Christina-i, faculty aser tsurabur temi mapang shia amalitepa aser longjemer inyakba ajanga result tajung adoker. Academic foundation ka tashi ita yanglutsü asoshi, Pre school nungi tenzüker. Ajasünung, kaketshir tajung adoktsü asoshi tesayurtemi shilem tuluka agir. Top jenjang aser 80%+ list nung LSHSS Hostel nung alir kaketshirtem tenüng angudang school pelaa liasü, ta ashi.

Hostel nung alir kaketshirtem junga anepaluba aser kaketshisatsü bushiba tsütsü bendanga agütsür nungitba atema, Christina-i matron, warden aser Hostel Superintendent dang kanga pelaba shisem. Iba den külemi, kaketshirtem temaba jenjang tongtettsüsa bendanga yariba

## Pungro nung 'My Road Campaign' agiogo

**Pungro, Chiteni/July 27, 2021 (TYO):** Pungro Town Students' Union-i achayanga, Bodhbarnü nungi tenzüka Hokolbarnü (July 21 nungi 23, 2021) tashi Pungro nung "MY ROAD CAMPAIGN" sentong ayonga agiogo, ta sangdong ka ajanga metetdaksü.

Iba campaign tenzüker nungi tatem tashi, Pungro nung alir temulunger aikati tenla agüja aser NGOs balalai nungita yariogo. Kasa mapang, iba campaign takok ngua agitsü asoshi, Pungro nung alir senso aikati rongsen den nübu agi yaria liasü. Renemba ama campaign takok ngua agitetba atema, Pungro Town Students' Union-i ajak dang pelaba lemsatepogo, ta kasa sangdong nung shia lir.

atema laisa class 10 aser 12 nung inyaker tesayurtem danga pelaba lemsatep.

Rank Holder kaketshir tenet rongnung, par asem - Ohiduz Zaman, Nonya Konyak aser Pungbale Rangkau nungeri jembia liasü. Pungbale-i, la iba School nung küm 10 tashi zünga arudang ajangshibatem telok den lemsatep.

### \* HSSLC 2021

Science Stream nung, No. 1 jenjang anguba atema Ohiduz Zaman nem tenüngsang agüja liasü. Computer Science nung Zaman ya State Topper asütsü. Class 12 Computer Science nung State Topper, Zaman-i marks 100 anguba ya iba Board indang putiotsü nung mezüng asütsü. Zaman indang percentage 96% liasü aser School-i pa nem senpet sen 25,000/- agütsü.

Science Stream nung jenjang 4buba nung takok angula, Pungbale Rangkau ya Higher Secondary Leaving Certificate, Science Stream nung State Female Topper aser Naga nung rongnung Topper asütsü. La indang percentage 94% liasü. School-i Pungbale nem senpet sen 15,000/- agütsü.

### \* HSLC 2021

HSLC 2021 nung LSHSS nungi Rank Holders kaketshir pungo dena lir. Parnok rongnung Emil Moncy Oomen - 4th Rank 97.6%, Nonya Konyak - 9th Rank 97%, Social

Science nung State Topper, Kimridi Thousen - 16th Rank 96% , Rila Sangtam - 20th Rank 95.50% aser Science nung State Topper Imlijungba Aier - 20th Rank 95.50% asütsü.

Par pungoprongla nem school-i senpet sen agütsüogo.

Maneni, Excellence in Teaching Award atema School-i "Vihutuo Excellence in Teaching Award" agüja liasü. Kaketshirtem jenjang tajungba yanglutsütsü nükla yur tesayurtemi anibelem arema aser bendanga agütsür inyakba atema, School-isa Miss Helen (English), Madam Nukshizenla (Alt. English), Miss Nangshienla (Environment), Sir Bikash(Social Science), Sir Medemenba (FIT), Madam Christina (Music), Madam Jennifer (Science), Sir Deb Kumar Gautam (Hindi), Sir Bidyut (Mathematics), Miss Inzuigongle (Physics), Miss Temsulemla (English), Sir Vihutuo (Computer Science), Sir Sadikul (Computer Science), Miss Khrielenuo(Chemistry), Miss Rupheus (Biology), Miss Mapunungla (Alt English), Miss Neishedeno (Sociology), Miss Imnajungla (History) aser Madam Sushmita (History) nung nem senpet sen agütsüogo.

Moderator, Madam Nukshizenla-i tepela anküp o jemi aser iba sentong tembanga Chaplain cum Hostel Superintendent, Sir. P.V. Francis-i sarasadem.



## OFFICE OF THE KOHIMA SUNGRATSÜ STUDENTS' UNION

### TENÜNGSANG AGÜTSÜR

NBSE ajanga 2021 küm agiba HSLC aser HSSLC tatidang nung asen kaketshirtem kwikati takok tajung ngutetogo nenok ajak nem tenüngsang agütsür. Talisa ano kaketshirtem shirnokisa temaba jenjang nung takok nguteta asen yimer kaketshir nem konang bener arutsü nung Tsüngrem tenüng asanger aser nenok ajak nem tenüngsang aser tetushi lemsateper.

1. **Sp. Tiamsong Aier** Top 9 (HSLC) S/o. Lipokyang Aier
2. **Kr. Wangshirenla Aier** Top 19 (a) (HSLC) D/o. Dr. Imtiwapang Aier
3. **Kr. Chubatola Aier** Top 8 (a) (HSSLC) D/o. Lt. Rongsenwapang Aier

Kohima Sungratsü Students' Union-i kaketshir ajak tarutsü anogotem nunga maneni takok ngudakjang ta sarasadem.

Sd/-  
**Imnasashi Ozukum**  
Tir

Sd/-  
**Merensangla Longchar**  
Tongti Zulur

## Office of the SOYIM SHISALUYIMER

### TELONGJEM KOHIMA TENTET KONANG TETUSHI AGÜTSÜR

Soyim Shisaluyimer Kohima Tentet-i külem züngsem Sp. Aotushi Imsong, S/o. Wb. Taliwapang Imsong aser Wt. Pangerlemla Jamir, HSLC tatidang nung top 12th aser Kr. Tzayumongla Jamir D/o. Dr. Tiakaba Jamir aser Wt. Sentirenla Longkumer, Social Science nung subject topper ajangzükba asoshi pelaba lemsateper.

Ano asen züngsem shisaluyimertem shirnokisa iba kasa tatidang nung takok nguogo nenok ajak dang kangasa pelar. Tarutsü nunga züngsem ajak nem takok moajangma.

Sd/-  
**President**  
**Toshimongba Jamir**

Sd/-  
**Gen. Secretary**  
**Obendangla Pongen**

## Mulungnen O



ASO :  
01-10-1944

ASÜ :  
19-7-2021

**Asür Pangjungtem Sü** manemi aliba anogo nungi tenzüka pa akümüli wadang tembangba anogo tashi Arogo, yimtsüryimer, bendanglen alir temba-tinur, tembar aser temeimertem shirnokisa ozü kibong den sarasadem, rongsen aser nübu agüja yariogo, nenok ajak dangi kangasa pelaba iba zülü ajanga lemsateper.

Taochisang Tsüngremi nenok taküm aser kibongtem ajak tali azükarua moajang ta sarasademtsür.

~ **Temeimba Kinungtsü, Chirnur aser Kinungertem.**



## Office of the ASETKONG KAKETSHIR TELONGJEM MUNGDA

HQ. : Kubolong - 798615

### TENÜNGSANG AGÜTSÜR

Taküm NBSE ajanga agiba HSLC aser HSSLC tatidang nung Asetkong Kaketshirtem kwikati takok tajung ngutetogo, nenok ajak nem Asetkong Kaketshir Telongjem Mungdang (AKTM) mendenti nungi konang tetushi tulu agütsür.

Talisa, item teküboklen agüja aliba kaketshirtemi ajak dang nungi alia takok aser konang nungsang tulu AKTM nem bener arutsü nung tenüngsang tulu agütsür.

1. **Sp. Tiamsong Aier** (Süngratsü) S/o Wb. Lipokyang Aier-i HSLC tatidang nung Don Bosco Hr. Sec. School, Dimapur nungi Top 9 jenjang nung takok angu aser English, Mathematics, Social Science, Environmental Education nung subject topper angu.
2. **Kr. Ochien** (Mopungchuket) D/o Wb. Tajenmeren Jamir-i HSLC tatidang nung St. John Hr. Sec. School, Dimapur nungi Top 12 jenjang nung takok angu.
3. **Kr. Wangshirenla** (Süngratsü) D/o Dr. Imtiwapang Aier-i HSLC tatidang nung Northfield, Kohima nungi Top 19 jenjang nung takok angu.
4. **Kr. Chubatola** (Süngratsü) D/o Lt. Rongsenwapang Aier-i HSSLC(Arts) tatidang nung Christian Hr. Sec. School, Dimapur nungi Top 8 jenjang nung takok angu.
5. **Sp. Imsuwaden Ozukum** (Mopungchuket) S/o Wb. Meyimangyang Ozukum-i HSSLC tatidang nung Clark Memorial Hr. Sec. School nungi Ao subject nung topper angu.

Tarutsü anogotem nung Tsüngremi nenok pei-pe wadang balala ajak nung tali moajang ta sarasademtsür.

Sd/-  
**Lanulemba Longchar**  
President, AKTM

Sd/-  
**Merensangba Aier**  
General Secretary, AKTM

## Office of the SÜNGRATSÜ SENSO TELONGJEM KOHIMA

Nagaland -797001

### TENÜNGSANG AGÜTSÜR

Süngratsü Senso Telongjem Kohima, Süngratsülar Telongjem Kohima aser Sungratsü Students' Union Kohima menjenti ajanga asen Süngratsü kaketshirtem shirnokisa HSLC aser HSSLC tatidang nung takok tajung nguogo nenok ajak nem tenüngsang agütsür. Talisa item temaba jenjang nung takok angur ajanga konang nungsang tulu yimer nem bener arutsü nung tenüngsang agütsür.

1. Shri. Tiamsong Aier, S/o. Mr. Lipokyang Aier & Mrs. Atsüngla, for securing top 9th position (HSLC).
  2. Ms. Wangshirenla Aier, D/o. Dr. Imtiwapang Aier & Mrs. Kiehungle, for securing top 19th position (HSLC).
  3. Ms. Chubatola, D/o. Late Rongsenwapang Aier & Mrs. Nungshikala Lemtur, for securing top 8th(HSSLC)Arts.
- Iba den külemi Govt. mapa tenzüka nung temaba mendeni aturtem nem tetushi tulu agütsür.
1. Mr. T. Nungsang Asstt. Mechanical Engineer Urban Development.
  2. Mr. Mu1onglepdan Aier Deputy Director Education Department.
  3. Mrs. A Toshila jamir Deputy Director Education Department.
  4. Mr. Nokensashi Asstt. Commandant 4th NAP.
  5. Mr. Imkumnixung Aier S/o Mr. Imsutemjen Aier & Mrs. Tiamongla for securing the Post of Station Suptd, Nagaland State Transport through NPSC.

Union ajanga NBSE 2021 kaketshir takok angurtem ajak aser Govt. mapa nung temaba mendeni aturtem ajak tarutsü nunga takok tajung ngudakjangma ta sarasadema moatsür.

Sd/-  
**Tiarenla Walling**  
President  
Sungratsülar Senso Telongjem Kohima

Sd/-  
**Bendangyapang Aier**  
President  
Sungratsü Senso Telongjem Kohima

## ALI AYOKTSÜ LIR

Naga United Village Govt. High School anasa  
Sq. ft nung Rs. 230  
Contact - 8974869756 / 6909596955

## Tokyo Olympics: Lovlina Borgohain quarter final-i iogo



Tokyo, Chiteni/July 27, 2021

(Agencies): Taküm Olympics nung mezüing shilem agila, India tsür, boxer Lovlina Borgohain-i la tata asaya (69kg) nung takok anguba sülen, quarterfinal-i iogo.

Mongolbarnü, tetsür 69kg category - 'last-16-stage bout' tetoktepba nung, Lovlina-i Germany tsür Nadine Apetz madak takok angu. Iba anogo India tsür boxing asayar rongnung Lovlina kistung asaya, kong Lovlina-i la dang nungi arishi küm 12 agi tain - Nadine madak point 3-2 agi takok angu.

Boxer anaprongla (Lovlina aser Nadine) iba Olympics nung mezüing shilem agir asütsü aser India boxing team nungi mezüing quarter final tongteter züngsem tuku rongnung, Lovlina mezüing kümogo.

Tetsür 69kg category 'last-16-stage bout' tetoktepba nung arishi küm 23 tain Lovlina-i kanga meranga Nadine den tsüingtep aser lai iba asaya koktetsüsa Nadine amokbanga

asaya. Split point nung lai round asempronlga akok.

Olympics asayamung nung, boxing asaya atema mezüing qualify asür Germany tetsür rongnung arishi küm 35 tain Nadine Apetz asütsü. Nadine ya taoba mapang European Champion asayar ka aser World Championship nung anaben tashi lai bronze medal takok nguogo.

Ano külen, Borgohain-ia anaben tashi World Championship kokdanga lir aser Asian championship nung bronze medal nguogo. July 30, 2021 nü quarter final nung Lovlina-i China - Taipei tsür Nien-Chin Chen den asayatsü. Seed pezübuba, Chen ya taoba mapang world champion boxer ka lir. Iba bout nung Lovlina-i Chen kokra, Tokyo Games nung lai bronze medal agizüktsü asoshi maongka tulu angutsü.

2019 Asian Championships nung Chen-i silver medal takok angu aser pre-quarterfinal bout nung lai 3-2 agi Italy tsür Angela

Carini tsükdaktsü.

India tsür boxer tasen, Lovlina ya Assam State nungi lir aser iba tetoktepba nung lai tasa melenshia masayadang, mezüing round nung lai tashi agüja Nadine den tsüingtep. Iba sülen, lai counter-attack' tasa amshia Nadine den asaya liasü.

Nadine-i tsüingoktsüba yimya balala ajanga Lovlina timtem asaya, ajisüaka, Lovlina tasa ajanga Nadine-i iba asaya mekokteti tembang.

Lovlina-i tsüingtepba piyong, 'left hook' amshia asaya.

Germany boxing tsütsü Nadine Apetz ya boxer tajung ka ama züngshir. Neuroscience nung lai PhD agidar aser Olympics nung shilem agitsü nükjidong nung, Nadine-i küm ka shi iba wadang toktsü.

Taoba küm, European Qualification Tournament nung semifinal tashi tonga asayaba sülen, iba Games nung asayatsü asoshi Nadine Apetz temsüa aküm.

## India vs Sri Lanka: 2buba T20I asaya anogo atsülanger

Colombo, Chiteni/July 27, 2021

(Agencies): Mongolbarnü, India aser Sri Lanka na tsüingda tanabuba T20 International asaya tenzüktsü lia, all-rounder Krunal Pandya dak Covid-19 positive putetba sülen, iba asaya anogo ka atsülangtsüogo.

Telok ana tsüingda tanabuba T20 ya July 28, 2021 nü R Premadasa stadium, Colombo nung asayatsü. Bresttibarnü, iba series final asayatsü ghonda 24 lia tanabuba T20 asayatsü sentong yangludat.

Pandya dak Covid-19 putetba sülen, India aser Sri Lankan team anaprongla quarantine-i yokogo. Kasa mapang, Krunal Pandya den külemi kazürtem jangjaa Covid-19 atema tendangtsü. Iba asaya anogo kati atsülanger asütsü, saka Bodhbarnü match tanabuba asayatsü asoshi timtem adoktsü ama

asadangteter.

India-i 2-1 agi Sri Lanka madak ODI series kokogo aser iba T20I series nunga parnok 1-0 agi Sri Lanka tejakdang lir.

Taoba hopta tembangba ODI series tetenzüklena Sri Lankan team indang batting coach aser video analyst naprongla dak Covid19 putetba sülen, mezüing ODI asaya anogo atsülangja liasü.

"Sri Lanka aser India tsüingda July 27 nü asayatsü aliba tanabuba T20I anogo ka atsülangtsüogo aser Bodhbarnü - July 28 iba match asayatsü. Iba asaya metenzükdang, Mongolbar anepdang asayar aser staff tem Rapid Antigen Tests agiba sülen, Team India all-rounder Krunal Pandya dak covid-19 positive putet. Medical Team temi Pandya den külemi kazür züngsem 8 shi jangjatetogo. Squad nung tashidak menar alirtem

jangjatetsü atema, contingent ajunga RT-PCR test agidar," ta Mongolbarnü Board of Control for Cricket in India (BCCI) sangdong ka ajanga metetdaksü.

July ita tetenzüklen, England tour mapang, India camp nung züngsem kar dak Covid-19 puteta liasü. Rishabh Pant dak Covid-19 positive putet aser practice match atema tanüingba India squad Durham-i aoba mapang, Pant London nung quarantine süa amung.

Maneni, England nungi Prithvi Shaw aser Suryakumar Yadav naprongla Sri Lanka nungi England-i aotsü sentong renem. Sri Lanka nung iba format (T20) atema squad nung tenaprongla dena lir asünung, sentong tem mataloktsü akok. Colombo nung Krunal den külemi quarantine' asütsüsa kümra, tenaprongla England-i motettsü.

## Tokyo Olympics: India-i 3-0 agi Spain kokogo

Tokyo, Chiteni/July 27, 2021 (Agencies): Goal 1-7 agi Australia makokba sülen, iba tejashi küptoka, Mongolbarnü India tebur hockey team-i Spain madak goal 3-0 agi takok angu. India atema Simranjeet Singh aser Rupinder Pal Singh nati goal idaktsü.

Iba asaya shilem timbaka India team-i amokbanger asaya aser Spain pur nem goal ka dang idaktsütsü maongka magütsü parnoki tasa tajung amshia asaya achaayanga liasü.

Telok ana tsüingda asaya tenzük minute 8buba nung Simranjeet-i goal ka idaktsütsü maongka angu, saka pai goal meinoktsütet. Iba sülen, Spain-ia telangzüba agüja minute 12buba tsüingda goal ishiben yoktsü merangdang, saka India defence kanga akanga asayaba yong goal magütsü aser minute 14buba nung Simranjeet-isa goal ka idakja India pur goal 1-0 agi Spain tejakdang kümadok.

India-i penalty corner yoktsü maongka kar angu aser

pezübuba penalty corner nung Rupinder-i goal tanabuba idakja par telok goal 2-0 agi tejakdang ser tanabuba quarter atong.

Tanabuba quarter asaya tenzükli Spain-ia goal idaktsütsü temlungtetba nung asaya, saka India-i parnok nem goal idaktsütsü maongka magütsü aser parnok yimya aziükteta asayatet.

Minute 24buba nung PR Sreejesh moapu telungi aita külem team pur den asaya tenzük aser pai tasa balala amshia tanüingba shilem tashi junga asayaogo. Spain pur 0-2 agi tesülen ser half time tongadok.

Tasembuba quarter nung, India team asentenshir asaya tenzük aser Spain-ia India nem goal talila magütsütsü nükjidong yur asaya. Quarter tatemba nung Spain-i penalty corner ka dang menguteti asaya aliba mapang, Rupinder Pal Singh-i ano goal ka idaktsüba sülen, India team-i goal 3-0 agi iba asaya akok.

## Tokyo Olympics: Naomi Osaka tasembuba round nung tsük



nokdangtsü aser zükloksütsü asoshi maongka magitet.

Iba asaya mezüing set nung, Vondrousova-i kanga dang kara asaya tenzük aser Osaka nem maongka magütsü mapang tatsüka tsüingda lai point 4-0 agi Osaka ajatet.

Tanabuba set mezüing game nung, Osaka-i Vondrousova indang serve kokteta asaya, saka lai double fault' menaba yong tena tsüingda 2-2 kümadok.

Kasa set nung, Osaka-i backhand amshia court adena ball zükdoka aser tanaben la serve nung point mengutetba sülen, iba asaya tembangadok. Asaya temli dang Court telung nung Osaka-i Vondrousova den salemtepa la amendaki oa yangkhu bena arur Vondrousova sülen court nungi tukadok.

Asayar anaprongla winner 22 (22 each) angu, kong Osaka-i 32ben tashi unforced error angu aser Vondrousova indang unforced error 10 dang liasü.

Deobarnü, tetsür kija mezüing round nung, world no. 1 aser Wimbledon champion Ash Barty tsükadokba sülen, Tokyo Olympics - tetsür kija tennis asayamung nungi temaba 'draw card' ana tashi tukadoker asütsü.

Taküm French Open asayamung nung shilem magii aser ita ana tashi anisüingzüka amungba sülen, Tokyo Olympics - tennis asayamung nung Osaka-i mezüing shilem agia liasü.

Tokyo, Chiteni/July 27, 2021

(Agencies): Mongolbarnü, Tokyo Olympics - tetsür kija tennis asaya nung, World No.2 aser Japan tsür Naomi Osaka tsükogo.

Tetsür kija tasembuba round asaya nung, taoba mapang French Open finalist - Czech Republic tsür Marketa Vondrousova-i 6-1, 6-4 agi Osaka tsükdaktsü.

Iba round nung Osaka kanga timtema asaya liasü aser set ana tashi nung lai unforced errors 18 angu, koba Vondrousova-i aibelenba dang nungi asembe agi timba asütsü.

Osaka, shibai Hokolbarnü, Tokyo Olympics lapokba sentong tatemlen 'Olympic cauldron' nung mi tsüklokja liasü, iba blue court nung lai jangratema masaya aser Vondrousova menepa mesüra la tasa aziüoka asayatsü asoshi lai maongka mengutet. Czech tsür Vondrousova-i drop-shot' aser tanga shot balala ajanga point angu, kong Osaka-i item

**BILEMDANGANG**

"Nisung tajung den medemra  
tajung akümstsü angazüker."